

02 NOV 1999

Dewan-Pengundi

DEWAN PERNIAGAAN CINA YAKIN PENGUNDI CINA AKAN TERUS SOKONG KERAJAAN

PUTRAJAYA, 2 Nov (Bernama) -- Dua organisasi terbesar masyarakat Cina dalam bidang ekonomi dan sosial yakin pengundi masyarakat Cina yang kebanyakannya ahli perniagaan akan memberi sokongan mereka kepada kerajaan Barisan Nasional (BN) pada pilihan raya akan datang berikutan kejayaan kerajaan memulihkan ekonomi.

Kedua-dua organisasi itu ialah Gabungan Dewan-Dewan dan Perindustrian Cina Malaysia (ACCCIM) dan Gabungan Pertubuhan Cina Malaysia (FCAM).

Seramai 30 wakil daripada kedua-dua organisasi itu mengadakan pertemuan dan perbincangan hampir satu jam dengan Perdana Menteri, Datuk Seri Dr Mahathir Mohamad di Jabatan Perdana Menteri di sini hari ini. Hadir sama dalam pertemuan itu ialah Presiden ACCCIM Datuk Lim Guan Teik dan Presiden FCAM Datuk Chong Chin Shoong

Setiausaha jawatankuasa penyelarasa ACCCIM dan FCAM bagi pertemuan itu, David Chua berkata prestasi ekonomi adalah satu faktor yang dijadikan ukuran bagi pengundi Cina dalam membuat pemilihan sebuah kerajaan.

"Prestasi ekonomi adalah satu faktor. Masyarakat Cina melihat keadaan keseluruhan dan juga mempunyai tanggapan yang jauh dan yakin sokongan kepada kerajaan akan terus dikekalkan seperti sedia kala," kata Chua kepada pemberita selepas pertemuan itu.

Ahli perniagaan Cina yakin ekonomi negara telah pulih daripada kegawatan dan sedang menuju ke landasan pertumbuhan yang lebih mantap, katanya dan menambah kedua-dua organisasi itu yakin jangkaan pertumbuhan ekonomi sebanyak lima peratus tahun depan akan dicapai.

Chua yang juga timbalan setiausaha agung ACCCIM berkata menerusi pertemuan itu mereka memahami dengan lebih jelas mengenai langkah-langkah pemulihan ekonomi seperti kawalan matawang dan kesan-kesan positif yang dicapai terutama pada pertengahan tahun ini dan untuk jangka panjang.

Angka pertumbuhan ekonomi yang mencapai 4.3 peratus tahun ini seperti yang diumumkan dalam laporan ekonomi 1999/2000 adalah jauh lebih tinggi daripada anggaran kerajaan, katanya dan menambah ia boleh dianggap sebagai satu angka konservatif tetapi yang sebenarnya ia jauh lebih baik.

Mengenai perbincangan dengan Perdana Menteri, Chua berkata kedua-dua wakil pertubuhan itu bertukar-tukar fikiran dengan Dr Mahathir mengenai keadaan semasa.

Katanya Dr Mahathir turut menerangkan mengenai keadaan semasa dan harapan beliau supaya masyarakat Cina memberi sokongan padu kepada kerajaan supaya dapat bersama-sama terus memajukan negara dan mengekalkan keadaan yang mantap serta suasana harmoni.

Menurutnya pada pertemuan itu kedua-dua pertubuhan itu menyatakan sokongan masyarakat perniagaan Cina kepada Dr Mahathir sebagai pemimpin dan berharap beliau terus memimpin negara ke alaf baru.

Sebelum pertemuan itu, ACCCIM dan FCAM dalam satu kenyataan menyatakan sokongan penuh ke atas segala tindakan dan langkah yang diambil kerajaan di bawah kepimpinan Dr Mahathir dalam usaha menangani dan menghadapi cabaran ekonomi negara serta menentang segala bentuk ancaman ke atas keutuhan dan kedaulatan negara, ekonomi serta kepimpinan negara.

"Kami memberi sokongan padu kepada kerajaan dan akan terus berusaha serta bekerjasama dengan pucuk pimpinan negara bagi mencapai kestabilan, keamanan dan kemajuan untuk membawa negara ke alaf baru dan memenuhi aspirasi Wawasan 2020.

-- BERNAMA

HS ARA LAT